


KUBAKA KIELO YA MBENI

NA MANIMA YA KUMEKAMA

 Mu ke kukiyufula tí. . . Beno banza, mu ke na mwà-dibanza, mutindu, kumona bantu kutelema na ntangu beto ke tanga Ndinga. Beno ke zolaka mutindu yina ve? Beto ke telemaka na kupesa lukumu, beto ke telemaka samu na kupesa lukumu na yinsi na beto, samu na yinki ve kutelema samu na Ndinga ntangu yayi?

² Na ntangu ya beto kele ya kutelema na mwa-ntangu fioti. Mu vwandaka tanga journal mosi, ntama mingi ve, mpe mu vwandaka yindula, na mpimpa yina me luta samu na bantu yina telemaka samu na Klisto. Kana nge me salaka yawu ntete ve, nge lenda sala yawu bubu yayi ve?

³ Kuvwandaka na evangeliste mosi ya néne, yawu lenda vwanda bamvula makumi sambwadi na tanu me luta, mu ke bambuka diaka ve nkumbu na yandi. Mu banza yawu vwandaka Arthur McCoy, mpe yandi tambulaka na yinsi ya muvimba. Mpe na mpimpa mosi yandi monaka na ndosi tí yandi kwendáka na Nkembo. Mpe tubaka tí yandi kwendáka tii na ntuala ya Kielo, mpe yandi tubaka tí bawu zolaka ve na kukotisa yandi. Mpe tubaka mpe yandi tubaka: “Munu kele Arthur McCoy yina ya Etats-Unis. Munu kele evangéliste.”

⁴ Na yawu sinzidi ya kielo kótaka na kati, (yawu vwandaka kaka ndosi), mpe yandi kótaka na kati, mpe tubaka tí: “Munu kele mona nkumbu na nge ve.”

Yandi tubaka: “Mbote, munu vwandaka evangéliste.”

Yandi tubaka: “Tata, mu. . .”

⁵ Yandi tubaka: “Mbote, mu lenda kuzwa lúve ti. . . Kele na diambu mosi kele tambula mbote ve.”

⁶ Yandi tubaka tí: “Ve, tata. Munu kele na Buku awa. Mu ke mona nkumbu na nge ve.”

Mpe yandi tubaka: “Mbote, mu lenda sala diambu mosi samu na yawu?”

⁷ Yandi tubaka: “Nge lenda lomba diáka diambu na nge na Kiti ya kimfumu ya Mpembe ya Lusambusu.” Nzambi, sadisa munu. Mu zola kuma kuna ve.

⁸ Yandi tubaka, “Mbote, kana yina kele kaka kivuvu mosi samu na munu, mu ke banza tí mu ke tubila diambu ya munu.”

⁹ Mpe tubaka ti yandi banzaka tí yandi kwendaka na lweka mpe bandaka na kutambula na nzila, mpe mbote. . .

Mpe mutindu yandi bandaka, yandi tubaka tí yawu vwandaka mpimpa, mpe yawu kumaka nsemo mingi mpe nsemo mingi, mpe tubaka yawu monana tí Nsemo yayi vwandaka na nsuka ve, kasi yandi vwandaka na kati-kati na Yawu. Mpe tubaka tí yandi tubaka: “Nani yina kele kwisa pene-pene na Kiti ya Munu ya Lusambusu?”

¹⁰ Yandi tubaka tí: “Munu kele Arthur McCoy. Munu kele evangéliste, munu tinda kioyo ya bantu mingi na Yinsi ya Kimfumu.”

Yandi tubaka: “Nkumbu ya nge monanaka ve na kati ya Buku?”

“Kele ve.”

Tubaka, “Na yawu nge me bokilama na Kisika na Munu ya lusambusu?”

“Yinga tata.”

¹¹ “Yawu ke salama na kieleka. Mu ke sambisa nge na bamisiku ya Munu. Arthur McCoy, nge tubaka luvunu ata mbala mosi ve?”

¹² Yandi tubaka: “Munu banzaka ti mu vwandaka muntu mosi ya mbote tii kuna ya munu telemaka na ntwala ya Nsemo yayi.” Yandi tubaka: “Kasi na Ntwala ya Nsemo yina, munu vwandaka nsumuki.” Beto nionso ke vwanda mutindu yina. Nge lenda ntangu yayi kukimona tí nge kele ya kukengilama mbote-mbote, kasi vingila tii Kuna nge kuma na kisika yina. Yinki mutindu nge ke wà ntangu Yandi ke kupakula nge mafuta? Yinki mutindu nge ke kukimona fioti mingi! Yinki yawu lenda vwanda na ntwala ya Kiti ya Mpembe ya Lusambusu?

Yandi tubaka tí: “Nge tubaka luvunu ata mbala mosi ve?”

¹³ Yandi tubaka: “Mu banzaka tí munu vwandaka muntu ya kieleka, kasi mambu ya fioti-fioti yina mu banzaka ti yawu vwandaka mwa-luvunu ya fioti ya mpembe, Kuna yawu kumaka ya nene mpe ndombe.”

Yandi tubaka: “Yinga, tata, munu tubaka luvunu.”

Yandi tubaka: “Nge yibaka ata fioti ve?”

¹⁴ Yandi tubaka: “Samu na yawu mu banzaka tí mu vwandaka muntu ya kieleka, mpe mu yibaka ata mbala mosi ve,” kasi yandi tubaka tí, “na Ntwala ya Nsemo yina, mu—mu ndimisamaka tí kuvwandaka na mambu yankaka mu tubaka, yina vwandaka kieleka ve.”

Yandi tubaka tí: “Yinga, tata, mu yibaka.”

Yandi tubaka: “Nkanu na munu . . .”

¹⁵ Mpe yandi sungamaka kaka ntangu yina samu na kuwà nkanu ya yandi, “Kwenda na tiya yina ya kukonda nsuka yina ya kusungama ntama samu na diabulu ti bawanzio ya yandi,” mikwa nionso ya nzutu na munu kupanzanaka.

16 Yandi tubaka: “Mu waka Ndinga mosi ya kulutula kitoko yina ya mu me waka ntete ve na luzingu ya munu.” Yandi tubaka: “Ntangu ya munu balukaka samu na kutala, munu monaka ilungi yina ya kulutula kitoko yina mu me monaka ntete ve; ya kitoko kulutula ilungi ya mama na munu, Ndinga ya kitoko kulutula yina mama na munu ke bokilaka munu.” Tubaka, “Mu talaka na lweka ya munu. Mu waka Ndinga mosi, tubaka: ‘Tata, yawu kele ya kieleka, yandi tubaka luvunu mpe yandi vwandaka na kieleka ve. Kasi, na yinsi-ntoto yandi bakaka kisika ya Munu,’ tubaka tí, ‘ntangu yayi munu mpe ke baka kisika ya yandi.’”

17 Tala yina ya mu ke zola tí yawu salama Kuna. Mu ke zola baka kisika ya Yandi na ntangu yayi, samu, samu kana ntangu yango kukuma samu na munu, Yandi ke baka kisika ya munu.

18 Beto tanga na buku ya Genese 22: nzila ya 15, 16, 17, mpe 18.

Mpe wanzio ya MFUMU bokilaka Abraham kuna na zulu na mbala ya zole.

Mpe tubaka, Munu me sila Na munu mosi, tubaka MFUMU, samu nge me sala diambu yayi, mpe nge me manga ve na kupesa mwana ya nge ya bakala, mwana na nge kaka mosi ya bakala:

Na yawu, Munu ke sakumuna nge, . . . Mu ke kumisa dikanda na nge ya nene mutindu bambwetete ya zulu, mpe mutindu zelo yina kele na nzadi; mpe dikanda na nge ke baka kielo ya mbéni na yandi;

Mpe na nzila ya nkuna na nge mabuta nionso ya yinsi ya muvimba ke kuzwa lusakumunu; samu nge me lemuka na Ndinga ya munu.

Beto sambila.

19 Tata ya Mazulu, baka bisono na ntangu yayi, Mfumu, mpe longa beto. Bika tí Mpeve-Santu kunaka Bandinga, Mfumu, kaka tii na ntima ya mosi na mosi. Yina ke pesa kiese na bansatu ya beto na nkokila yayi, samu yawu kele ya nene, Mfumu. Mpe Nge tubaka na beto na kulomba mingi, na mutindu tí kiese na beto kuvwanda ya mingi. Beto me lomba yawu na Nkumbu ya Yesu. Amen.

Beno lenda vwanda.

20 Kana mu lenda pesa yintu ya dilongi, samu na mwa ntangu fioti. Ndinga na munu kele wakana mbote ve, kikuma yawu yina mu lenda pusana pene-pene ya micro. Mu zaba tí yawu ke sala mwa makelele, kasi bika beto kanga ntima fioti. Mu ke zola bokila yawu: *Kubaka Kielo Ya Mbeni Na Manima Ya Kumekama.*

21 Disolo ya beto kele zibula na mosi ya masolo ya kitoko mingi ya Abraham. Beno zaba tí Abraham kele tata ya lukwikilu. Mpe nsilulu pesamaka na Abraham. Mpe beto kele kaka bilandi ya yandi, na nzila ya Klisto, kele na nzila kaka mosi ya beto me

yamba nsilulu, kele na nzila ya Abraham. Ntangu yayi, Abraham vwandaka muntu mutindu bantu nionso, kasi yandi bokilamaka na Nzambi mpe yandi kangamaka na lubokilu yango. Ntangu Nzambi tubaka na yandi, Abraham tulaka ntembe ata mbàlà mosi ve na Ndinga yango. Yandi bikalaka kaka na Yawu. Ata nki mutindu mpasi vwandaka, yandi bikalaka kaka na Yawu.

²² Mpe Yandi silaka na yandi mwana ya bakala. Mpe yandi vingilaka bamvula makumi zole na tanu samu na kuzwa mwana ya bakala yango, na bokilaka yina nionso ke telemina yawu mutindu tí yawu ke zingaka ve. Mpe, na mwana yayi ya bakala, mabuta nionso ya ntoto ke kuzwa lusakumunu. Mbuta ya dikanda vwandaka na lukwikilu na lubokilu ya yandi mpe na Ndinga ya nsilulu.

²³ Yandi vwandaka kifwanikisu ya yina ya beto fwana vwanda na yawu. Ntangu yayi beto, bayina fwaka na Klisto, beto kele Nkuna ya Abraham.

²⁴ Ntangu yayi, vwandaka na ba nkuna zole ya Abraham. Mosi na bawu vwandaka nkuna ya kimuntu; yina yankaka vwandaka Nkuna ya kimpeve. Mosi na bawu vwandaka ya kimuntu na nzutu na yandi; yina yankaka vwandaka Nkuna ya lukwikilu na yandi, lukwikilu, yina ya beto lenda vwanda Nkuna ya Abraham na nzila ya Ndinga ya nsilulu.

²⁵ Mpe ntangu yayi na maníma yandi mekamaka bamvula makumi zole na tanu, mpe, na kisika yandi lemba mingi, ngolo kwisaka diáka mingi kulutila. Beno me mona, kana yawu salamaka ve na mvula ya ntete, na mvula ya zole yawu zolaka vwanda kimangu mosi ya nene, samu yawu me lungisa bamvula zole. Mpe yandi yikaka bamvula mingi, na mutindu tí yandi kumaka mununu, mpe nzutu na yandi kulembaka. Matrice ya Sarah, matrice, to yawu (lendaka) vwandaka ya kisita. Mpe ngolo na yandi manaka, mpe kuna vwandaka . . . Yawu lendaka salama ata fioti ve.

²⁶ Beno me banzaka ntete yinki Nzambi salaka kuna? Beno me mona, Yandi mekaka ata mbàlà mosi ve na kusala tí kivumu na yandi kuvwanda na bana. Samu, banza, kana Yandi salaka yawu, kuna beno bambuka kana Yandi salaka yawu . . . bawu vwandaka ve na biberon ya bunkete, na bilumbu ya bawu, na kupesila mwana, miliki ya ngombe. Beno me mona? Yandi mpe lendaka . . . Misisa ya mabele ya yandi vwandaka ya kuyuma. Yawu yina Yandi—Yandi lendaka ve . . . Yawu vwandaka tí diambu mosi lenda salama.

²⁷ Na yawu, beno tala kento mosi, yina me lungisa bamvula nkama mosi, yina kele na mpasi ya kubuta. Ntima na yandi lendaka ve kukanga ntima na mpasi ya kubuta. Yawu kele mpasi mingi samu na kento, ya bamvula makumi yiya, na kusala yawu. Ntima ya yandi lendaka ve kukangila yawu ntima. Na yawu beno zába yinki Yandi salaka? Kana beno lenda tala mbote . . .

28 Ntangu yayi mu zaba tí mingi lenda ndima yawu ve. Kana yawu kele ya kieleka na kubasisa Ndinga yayi? Beno me mona, munu. . . Yawu lenda vwanda kaka dibanza ya munu mosi.

29 Beno me mona, Biblia kele Buku mosi ya kimpeve. Yawu sonamaka na mutindu mosi tí yawu me bumbama na ba lukolo, theologien. Yikwa zaba yawu mutindu yina? Yesu tondaka Nzambi. Yandi tubaka, “Tata, munu ke vtutula na Nge matondo, samu Nge me bumba Yawu na meso ya bantu ya mayele mpe ya ngangu, mpe me monisa Yawu na bana ya fioti samu tí bawu lenda kuzwa mazaya.” Yawu kele Buku ya zola. Na ntangu zola ya Nzambi kele kóta na kati ya ntima, nge lenda zola Nzambi, mpamba ve Yandi ke kukimonisa Yandi mosi, disongidila ya Biblia. Ntendulu ya Biblia kele Nzambi Yandi mosi kele tendulaka bansilulu na Yandi. Kasi, Biblia, Yawu sonamaka na kati ya nzila.

30 Ntangu yayi, mutindu kento ya munu, oh, yandi kele kento mosi kaka yina ke sepedisaka munu ya kulutila na kati ya yinza ya muvimba, mpe ya kieleka mu ke zolaka yandi. Yandi mpe ke zolaka munu. Kana munu kele na bisika ya nkaka, yandi ke sonikila munu mukanda, mpe yandi ke tuba: “Ya zola Bill, na mpimpa yayi munu me tula bana na mbeto. Munu yobilaka bubu yayi,” mpe nionso yina yandi salaka, mpe nionso yina. Ntangu yayi yandi ke tuba yawu na mukanda. Kasi, nge me mona, munu ke zolaka yandi mingi, mpe beto mpe me vwanda mingi samu na kukuma mosi, tii kuna mu—mu lenda tanga na kati ya banzila. Mu zaba yina yandi zola tuba, beno me mona, ata yandi kele tubila munu yawu to ve, beno me mona. Mu—mu zaba yinki yandi zola tuba, samu yawu kele zola na munu samu na yandi, mutindu ya munu ke bakula yandi.

31 Mbote, yayi kele mutindu yina Biblia sonamaka. Beno me mona? Bantu yina longukaka mingi kele luta na zulu na yawu; bawu ke simba yawu ata fioti ve. Beno me mona, beno lenda vwanda na zola ya Ndinga ya Yandi, “samu na kuzaba Yandi.” Beno me mona?

32 Ntangu yayi, ntangu yayi awa, tala yinki Yandi salaka. Ntangu yayi Abraham na Sarah bawu zole vwandaka me nuna, “ya kulemba mingi,” mutindu Biblia me tuba. Ntangu yayi kuvwandaka ve kaka samu ti bawu vwandaka bantu ya mbote yawu yina bawu zingaka bamvula mingi kuna. Biblia ke tuba tí, “Bawu vwandaka ya kununa mingi na bamvula.”

33 Tala mbote, kaka kuna na maníma ya Wanzio mona naka, beto vwandaka tuba samu na; yina vwandaka Elohim, Nzambi. Mpe Yandi tubaka, tubilaka Abraham: “Mu ke kwisa tala nge diaka na ntangu ya luzingu.” Ntangu yayi, tala mbote, nionso kuna na nsi, bawu vwandaka kifwànisu ya Dibuundu, na ndonga nionso.

³⁴ Ntangu yayi tala. Tala yina salamaka. Ntangu yayi, Yandi bakaka Sarah kaka mbàlà mosi ve mpe yidikaka yandi, mpe yidikaka Abraham. Yandi vutulaka bawu diáka batoko ya bakala na ya kento. Ntangu yayi yawu lenda monana diambu ya ngitukulu, kasi na ntangu yayi beno tala yina me landa na Ndinga, mpe tula yawu kisika mosi. Ndinga kele ya kutwadisa na kimpeve, mpe nge fwana vwanda na nsi ya Ndinga yina me twadisama na kimpeve. Ntangu yayi, bambuka moyo, kaka na maníma na yawu, kaka na maníma ya kumona na ya Wanzio yayi. . .

³⁵ Ya kieleka mu lenda mona yawu kaka, nsuki yina ya mpembe ya Sarah, mwa-mununu ya kento na kitambala na zulu ya mapeka, mpe yintu ya kukanga na kitambàlà, yina vwandaka tambula na nkawa na diboko, ke tambula-tambula. “Munu, lenda vwanda diaka na nsatu ya Mfumu na munu, mpe yandi mpe, mununu?” Beno me mona? Mpe tala Abraham, mandefo ya yinda, ke tambula na nkawa na diboko, sambu yandi vwandaka, ya kununa mingi na bamvula.

³⁶ Mpe mu ke mona, na suka yina landaka, mapeka ya yandi bandaka na kuyilama, kunki bandaka na kumana na mukongo na yandi. Nsuki ya yandi bandaka na kusoba. Bawu kitukaka batoko ya bakala na ya kento. Kaka na kusongisa yina Yandi kele sala na Nkuna ya Kimfumu ya Abraham, beno me mona, ntangu beto ke “soba na ntangu fioti, na kubweta ya disu, mpe kumata na zulu beto nionso kumosi.”

³⁷ Beno tala diambu yina salamaka. Ntangu yayi beno bika mu tubila beno yawu. Ntangu yayi bawu salaka nzietolo mosi katuka kisika bawu vwandaka zinga kuna, na Gomorrhe; mpe bawu kwendaka tii kuna na Gerare, Filistine. Beno me mona yawu? Songisa yawu na zulu ya kalati ya yinza ya muvimba, yinki kitamina yawu kele. Yinki nzietolo ya yinda na makulu samu na minunu ya bankwelani yayi zole ya bamvula yina.

³⁸ Mpe kuna, katula yina, na—na Filistine, kuna kuvwandaka na ntinu mosi ya toko na nkumbu ya Abimelec, mpe yandi vwandaka sosa kento ya kukwela. Mpe yandi vwandaka na bana bakento nionso ya Filistine, kasi ntangu yandi mona mununu ya kento yayi, yandi tubaka: “Yandi kele mpe kitoko na kutala,” mpe yandi zolaka yandi mpe yandi zolaka kwela yandi. Ya kieleka. Uh-huh. Beno me mona, yandi vwandaka kitoko mingi. Beno me mona?

³⁹ Yandi kitukaka toko ya kento. Tala mbote, yandi me lunga, samu na kunata mwana yina. Nzambi me kumisa yandi muntu ya malu-malu. Yandi lendaka, na kusansa mwana yina. Mpe bambuka, Abraham, “nzutu na yandi na kutala vwandaka mutindu ya kufwà,” mpe Sarah mpe kufwàka ntangu Abraham vwandaka. . . Isaac kumaka na mvula makumi yiya na tanu, mu banza, ntangu Sarah kufwaka. Mpe Abraham na maníma na

yawu kwelaka kento yankaka mpe yandi butaka bana babakala sambwadi kukonda kutanga bana ya bakento. Amen.

⁴⁰ Beno me mona, tanga yawu na kati ya banzila. Yawu kele kifwànikisu mosi. Yawu ke monisa kuna yina Yandi ke sala na Bana ya Abraham. Beto me kuma pene-pene na yawu ntangu yayi, na yawu mapeka na beto yina me niefamaka mpe mambu nionso ke sala ata luswaswanu mosi ve, bankundi. Mpe bansuki na beto yina ya mpembe ti yina nionso ya kele, kele ntangu yayi kusala kima ve. Beto ke tala na maníma ve. Beto tala na ntwala na kisika ya beto zola kuma.

⁴¹ Mpe beno bambuka, kidímbu yayi ya beto ke mona, vwandaka kidímbu ya nsuka yina Abraham na Sarah na yandi mona ka, na ntwala ya mwana ya nsilulu kwisaka na luzingu. Beto ke ndima tí beto ke zinga na ntangu yango.

⁴² Tata ya makanda, na maníma ya lubutuku ya mwana-bakala yango. . . Beno lenda banza Isaac, pene-pene ya bamvula kumi na zole; mwana mosi ya zola, mwana bakala na nsuki ya nkufi ya kulingama, na mwa-meso ya ndòmbè? Mu ke banza mutindu mama na yandi kuwaka; mwana-kento mosi ya kitoko, kuna, mpe tata na yandi. Kilúmbu mosi, Nzambi tubaka, ntangu yayi, mumbandu; beto me kuma ntama mingi, ntangu yango me kuma. “Munu me kumisa nge tata ya makanda, na nzila ya mwana yayi ya bakala, kasi mu ke zola tí nge baka mwana yango yayi ya bakala nata yandi na zulu ya mongo yina mu ke songisa nge, mpe Mu ke lomba nge na kufwà yandi kuna na zulu, samu na munkayulu.” Beno lenda banza yawu?

⁴³ Ntangu yayi yawu me lombamaka na nge ntete ve na kukuma na kumekama ya mutindu yayi. Yandi ke sala yawu diaka ve ntangu yayi. Yina vwandaka mbandu, kifwànisu.

⁴⁴ Abraham vwandaka na boma? Ve, tata. Abraham tubaka mutindu yayi: “Mu ke na lukwikilu tí Yandi ke na kiyeka ya kutelemisa yandi na lufwà, samu munu zwaka yandi mutindu yina basikaka na kati ya bafwà. Mpe kana musiku yayi ya Nzambi me zabisa munu na kusala mutindu yayi, mpe na yawu mu me bikala na kieleka, mpe yawu futamaka, na kupesa munu mwana-bakala; Nzambi kele na kiyeka ya kuvumbula yandi na lufwa; wapi kuna ya munu bakaka yandi, mutindu kifwànisu.”

⁴⁵ Oh, nkundi, na munu! Kana Nzambi pesa Mpeve-Santu na beno ba Pentecotiste, na kutúbaka bandinga yankaka, yikwa kulutila beno lendaka kwikila na kiyeka na Yandi ya kubelula bimbevo, na mambote na Yandi mpe mawete ya yandi! Kana Yandi salaka yawu, sambu na kutelemina ba theologien nionso ya yinsi na beto! Bawu tubaka tí yawu lendaka salama ve, kasi Nzambi salaka yawu samu Yandi silaka yawu. Na yawu telema pene-pene ya Munduki ya nge, Ndinga ya nge, Mbele ya nge, kwikila Ndinga ya Nzambi. Nzambi tubaka mutindu yina, mpe yawu me salama!

46 Beno tala mbote, ntangu yayi, yawu bakaka yandi bilúmbu tatu, ya nzietolo na zulu ya mpunda katuka kuna. Ntangu yayi mu lenda tambula, ntangu ya munu vwandaka tambula samu na kulangidila, mu tambulaka kiteso ya ba kilometre makumi tanu, konso kilúmbu na kati ya ntoto ya kuyuma ya kukonda masa; mpe beto vwandaka na ba ngungulu ya mazout, samu na kutúba mutindu yina. Kasi bantu yina, bawu vwandaka na mutindu mosi kaka ya kutambula, bawu vwandaka mata na zulu ya mpunda to—to kutambula na makulu. Mpe yandi tambulaka bilúmbu tatu katuka kisika yandi vwandaka zinga, mpe yandi talaka na zulu, na kati ya ntoto ya kuyuma ya kukonda masa, mpe yandi mona ka mongo mosi na ntama.

47 Yandi bakaka Isaac mpe kangaka yandi bansinga na maboko. Yina, beto nionso zaba, yawu na buku ya Genese kapu 22 awa, kele kifwànikisu ya Klisto. Tula yandi kuna na zulu ya mongo, kanga yandi, mutindu Yesu natamaka na zulu ya mongo, Mongo Calvaire; kifwanikisu ya Nzambi kele pesa Mwana na Yandi, na ntembe ve.

48 Kasi ntangu ya bawu kumaka kuna na zulu, mpe yandi vwandaka ya bulemfu, Isaac bandaka na kuyindula tí diambu mosi kele tambula mbote ve. Yandi tubaka: “Tata, nkuni yawu yayi, mesa ya munkayulu yawu yayi, tiya yawu yayi, kasi wapi munkayulu?”

49 Mpe Abraham, yina zábaka na mayele na yandi tí, tuka ntama Ndinga ya Nzambi telemaka kuna, yandi tubaka: “Mwana na munu, Nzambi kele na kiyeka ya kubasisa munkayulu samu na Yandi mosi.” Yandi bokilaka kisika yina, “Jehovah-Jiré.”

50 Mpe ntangu yandi kangaka mwana ya yandi, yina ya bulemvo tii na lufwà; kuladisa yandi na zulu ya mutalaka ya munkayulu, basisaka mbele na kati ya poketi na yawu, mpe yandi pusanaka na kubáka luzingu ya mwana na yandi mosi. Mpe, ntangu yandi salaka yawu, Kima mosi simbaka diboko ya yandi, mpe tubaka: “Abraham, telemisa diboko na nge.”

51 Mpe na ntangu yina, kimeme mosi ya bakala dilaka, na maníma na yandi, bibongo ya kukángama kuna na kati ya ntoto ya kuyuma ya kukonda masa.

52 Beno me banzaka yawu ntete, wapi kisika kimeme yina katukaka? Beno bambuka moyo, yinsi fúlúkaka na ba nkosi ti bambwa-nseke ti bibulu, ti bambisi yina ya kele diáka mameme. Mpe yinki kisika ya ntama yawu vwandaka na civilisation? Mpe, kuna, na nsongi ya mongo, kisika ya masa kele ve. Ye yandi lokutaka matadi, pene-pene, na kusala mesa ya munkayulu. Wapi kisika kimeme yina katukaka? Beno me mona?

53 Kasi yawu vwandaka vision ve. Yandi fwàka kimeme; yawu vwandaka na menga. Yinki yandi tubaka? “Nzambi kele na kiyeka ya kubasisa munkayulu samu na Yandi-mosi.”

54 Yinki mutindu *nge* ke bika kiti yina? Yinki mutindu mwana *yina* ya kikata ke kuma mbote, to *nge* na kati ya kiti yina, *nge* ke katuka kuna, *nge* mpasi ya ntima? Kukonda kutala nki diambu yango kele, “Nzambi kele na kiyeka ya kubasisa samu na Yandi-mosi.”

55 Abraham kwikilaka yawu. Tata ya makanda simbaka nsilulu ya kieleka. Mpe Yandi pesaka nsilulu, tí, “Nkuna ya nge! Samu nge me ndima Ndinga na Munu, kukonda kutala mambu yina ke luta, nkuna na nge ke botula kielo ya mbéni na yandi.”

56 Samu na yinki? Mbéni nionso yina ya kele kwisa, mutindu kifwànisu, na kunwanisa Abraham, Abra- . . . Mbéni ya, “Yandi me kuma mununu mingi. Munu me kuma mununu mingi. *Yayi* nionso, mpe nionso yankanka.” Yandi bikalaka ya kièléka me simba kaka nsilulu.

57 Ntangu yayi, muntu yina nionso kele na lukwikilu yina, yandi ke kwamina na kusimba kaka Ndinga ya Nzambi kukonda kutala bampasi. Ntangu yayi, kana nge lenda sala yawu ve, nge kele Nkuna ya dikanda ya Abraham ve. Yina kele lukwikilu yina Abraham vwandaka na yawu, Nkuna na yandi.

58 Nsilulu ya Abraham vwandaka tí “Nkuna,” ntangu yayi Nkuna na yandi ya kimfumu, mpe, mutindu mu me tubila beno yawu na mwa bantangu me luta. Mpe kidímbu to kidímbu yina Yandi pesaka na Abraham vwandaka kidímbu ya nsilulu. Mpe Nkuna ya kimfumu, na kutadila buku ya ba Ephesiens kapu 4:30, yawu “metulama na Mpeve-Santu,” na maníma ya kununga kumekama. Beno meka kubanza samu na yawu.

59 Bantu mingi ke banzaka ti bawu kele na Mpeve-Santu. Bantu mingi ke tadisaka ti bawu kele na Mpeve-Santu. Mingi lenda songisa mambu mingi mpe bidimbu na yawu. Kasi, kaka, kana yawu lenda ve kubikala na Ndinga yayi, yawu kele Mpeve-Santu ve. Beno me mona?

60 Nge ke kwikila konso Ndinga, na yawu nge ke tulama kidímbu na maníma ya kumekama. Ntangu beto me kwikila konso nsilulu kele na kati ya Ndinga, beto me tulama kidímbu na Mpeve, na kusongisa tí nsilulu kele ya kieleka. Yina kele yinki, yina kele Abraham, mutindu yandi salaka yawu. Na yawu, kaka na manima ya yina, beto ke vwanda na kiyeka ya kubotula kielo ya mbéni na beto. Nge lenda sala yawu ve tii kuna nge ke kuma ntete Nkuna yina. Bambuka, na kati ya Biblia . . .

61 Mu tubilaka yawu kuna, na Houston to na kisika yankaka, yina yankaka . . . to, mu banza na Dallas. *Kidímbu*.

62 Beno me mona, Juif mosi lendaka songisa, kuna na Israel, tí yandi vwandaka Juif na nzila ya nzengolo ya kibakala. Kasi Nzambi tubaka: “Kana mu mona menga! Mpe menga ke vwanda kidimbu samu na beno.”

63 Luzingu yina vwandaka na kati ya menga lendaka ve kukwisa na zulu ya musambidi, samu, mbote, yawu vwandaka luzingu ya mbisi ya kimenga, mpe yawu vwandaka kaka kifwānikisu yina vwandaka tadisa Luzingu ya kieleka ya kele kwisa. Na yawu, na mayele ya chimie, menga yawu mosi, lendaka vwanda ya mbwaki na zulu ya kielo ya yinzo mpe na zulu ya mabaya ya kielo.

64 Yawu tulamaka na hysope, yina ya kele matiti yina kele basikaka bisika nionso, yina kele monisa tí nge kele ve na nsatu ya kuvwanda na lukwikilu mosi ya nene. Nge lenda kaka kuvwanda na ya mutindu mosi, lukwikilu mosi yina nge ke na yawu, mutindu mosi na kupedisa camion na nge, kukwenda na yinzo-Nzambi. Beno me mona? Bantu mingi ke banzaka tí ntete bawu lenda vwanda kaka na kima mosi . . . Kasi, ve, ve, yawu kele kifu. Kaka lukwikilu mosi ya pete kele yina nionso ya nge kele na kupakukila Menga na yawu. Kuwa Ndinga, mpe kukwikila Ndinga, sadila Yawu, imene. Kwenda zenga kaka matiti na konso kisika na kuna na Palestine, yawu kele hysope, mwa matiti yina ke menaka na banzila ya bibaka ya bayinzo, mpe lweka na lweka, dindisa yawu na kati ya menga na bawu mpe tula yawu na kielo tí na mabaya ya kielo.

65 Mpe, banza tí, mambu ve wapi mutindu bawu vwandaka na nsi ya ngwisani, wapi mutindu Juif lendaka kusongisa tí yandi kele na nzengolo ya kibakala, wapi mutindu yandi vwandaka muntu mosi ya mbote, bangwisani nionso kufwaka kasi kidímbu vwandaka kuna. “Kana Mu me mona menga,” yawu kaka.

66 Ntangu yayi, Menga ntangu yayi, Kidímbu, yawu kele ya mayele ya chimie ve, ya mayele ya chimie ya Menga ya Klisto, samu Yawu mwanganaka bamvula mafunda na ntwala.

67 Kasi, beno me mona, wapi. . . yawu lendaka vwanda na mayele ya chimie kuna, luzingu ya bambisi lendaka ve kukwisa na muntu, samu luzingu ya mbisi kele na moyo ve. Mbisi lenda ve kuzaba mbote to yimbi. Yawu kele muntu yina kele na moyo.

68 Ntangu yayi, kasi ntangu Yesu, Mwana ya Nzambi, na lubutuku ya mwense, mwangisaka Menga na Yandi, Luzingu yina vwandaka na kati ya Menga vwandaka Nzambi Yandi-mosi. Biblia túbaka tí: “Beto me vulukaka na nzila ya Luzingu, ya Menga ya Nzambi.” Kuvwandaka menga ya Juif mosi ve, menga ya Muntu ya makanda ve; kasi Luzingu ya Nzambi. Nzambi salaka ditonsi ya Menga, lubutuku ya bumwense. Yandi zabaka ata nzutu ya bakala mosi ve, to yandi. . . to diki katukaka ve na yandi.

69 Mu zaba tí mingi kati na beno ke banzaka tí diki yina katukaka na yandi. Diki lendaka ve kuvwanda kuna kukonda kunikana ya nzutu, yinki Nzambi lendaka sala na ntangu yina? Beno me mona?

70 Yandi salaka nionso zole diki na ditonsi ya Menga, mpe yina vwandaka tabernacle ya Nzambi, ya santu. “Mu ke pesa muswa ve tí Santu na Munu kumona kupola.” Beno me mona wapi diki katukaka? “Mu ke bika mpe ve moyo na Yandi na difelo.” Nzutu na Yandi vwandaka ya santu! Oh, lala! Beno lenda ve, beno lenda kwikila yawu ve, yinki mutindu nge lenda kukibokila Muklisto?

71 “Beto me vuluka na Menga ya Nzambi.” Tala kisika lukwikilu na munu kele. Kele ve na kutambula na menga ya profete mosi, kele ve kutambula na menga ya muntu mosi ya mutindu yina, to ya longi mosi, to ya theologien. Beto kele tambula kuna na kati ya Menga ya Nzambi. Nzambi tubaka mutindu yina. Yandi kumaka muntu. Yandi sobaka kusalu na Yandi. Yandi zibulaka yinzo ya tenta na Yandi awa, na beto, mpe me kuma mosi na beto. Yandi kele Tata Mukudi ya beto. Yandi lenda kuma ya dikanda na beto, samu yawu vwandaka nsiku. Nzambi kumaka muntu mpe zingaka na kati na beto.

72 Tala mbote yinki mutindu yawu, yawu salamaka, Yandi ke katuka na Yandi, yina vwandaka Nzambi, Mpeve, mpe Mpeve yina ke kwisa na zulu ya mukwikidi. Na ntangu yina, Luzingu yina vwandaka na kati ya Munkayulu na beto, beto me kukitadisa na munkayulu na beto, beto me kukitadisa na Luzingu yina mosi.

73 Na mutindu yina yinki mutindu bawu lenda mona Luzingu ya Nzambi ke nikana na kati ya bantu, mpe kubokila Yawu kima ya mvindu, na ntangu Yina ke kukifwànikisa na Munkayulu na beto? “Yina ke kwikila na Munu, bisalu yina Mu me sala yandi mpe ke sala yawu.” Luzingu na Yandi kwendaka na zulu ya muka- . . . ya Munkayulu, na ntangu ya beto ke tetika maboko na beto na zulu na Yawu mpe kukifwanikisa beto mosi mutindu tí beto me fwà na mabanza na beto mosi. Mutindu yina wapi mutindu beto lenda bika ba denomination kukotisa beto na malongi ya kimuntu mpe mambu ya mutindu yina mpe kutuba tí beto kwikila na Yawu? Beto me fwàka na mambu yina.

74 Paul tubaka: “Ata mosi ve na mambu yayi kele kwamisa munu,” samu yandi kangamaka na dikunzi, Klisto. Mpe kusalu yina nionso me kuma ya kieleka na nsuka me kangama na dikunzi yina ke nikanaka ve, mpe dikunzi na munu kele Ndinga. Mpe bayina yankaka nionso kele, bayina me—bayina me butuka ya kièléka na Mpeve, Ndinga ya Nzambi kele dikunzi na bawu. Mu me kangamaka na Yawu. Mu me tula maboko na munu na zulu na Yawu. Mpe Yawu bakaka kisika na munu, mpe mu me kukifwànikisa munu mosi na Yandi. Beto zaba tí yandi silaka tí Yandi ke kukimonisa Yandi mosi na beto. Yawu basisa lukwikilu ya kièléka; lukwikilu na nge mosi ve, kasi lukwikilu na Yandi; kima mosi yina nge lenda keba ve. Yandi ke salaka yawu. Ntangu yayi tala mbote. Na yawu, mpe kaka, ntangu . . . nsilulu me pesama na nge.

⁷⁵ Yawu ke tadila ve yinzo-Nzambi yikwa nge me kotaka, mbàlà ikwa nge me bakaka mbotika; mbotika ilungi na ntwala, to na maníma, yinki mutindu nge zola sala yawu. Tii kuna Kidimbu yina ke tulama na zulu na nge, mpamba ve kuna, nge kele diáka ve na muswa ya kukibokila yina me kangama na Munkayulu na nge.

⁷⁶ Mpe yinki yayi kele Kidimbu ya Nzambi? Ba Ephesiens 4:30, me tuba: “Beno niongisa Mpeve-Santu ya Nzambi ve, yina pesamaka na beno mutindu kidimbu tii na Kilúmbu ya mvulusu na beno.” Kele ve tí katuka na reveil yayi tii na yina yankaka, kasi ya kukangama ya Kukonda nsuka tii na Kilúmbu ya mvulusu na beno.

⁷⁷ Mpe, bambuka, kana tí nge vwandaka ata fioti ve na kati ya mabanza ya Nzambi, nge ke vwanda ata fioti ve na Nzambi. Yikwa zaba tí Yandi vwandaka Mukudi? Mbote, samu na yawu, kima nionso yina bawu me sumbulula kele vutukaka na kisika ya ntete yina yawu vwandaka na ntwala ya kutekama. Na yawu kana Yandi kwisaka samu na kúsúmbúlúla beto, yinki mutindu beto lenda diáka, beto lendaka kuvwandaka ve bantu yina me súmbúlúka, mpe beto nionso “butukaka na disumu, salamaka na disumu ya nkú, kwisaka na ntoto na kutúbaka luvunu”? Yawu kele monisa tí Muklisto ya kièléka kele kumonisama ya kinama ya Nzambi, na ntwala tí yinza kusalama, to mbwetete mosi, to mupepe mosi, to kima mosi yankaka. Yawu kele ya Kukonda nsuka, mpe Yandi kwisaka kúsúmbúlúla beto. Yawu ke dibanza ya Nzambi, yina tubamaka na Ndinga mosi, yina monisamaka mpe vu . . . vutukaka beto na dibanza na Yandi.

⁷⁸ Tata Mukudi! Yina kele kikuma Nzambi Yandi mosi lendaka kuma mosi na beto, na kúsúmbúlúla. Kima yankaka ve lendaka sala yawu. Wanzio mosi ve lendaka sala yawu, kima mosi ve. Yandi lendaka kaka kukulumuka, kumekama mutindu beto kele, samu na kuvulusa beto.

⁷⁹ Beno tala mbote nkuna ya kimuntu ya Abraham. Beto tala fioti kati ya bana yina ya kimuntu, mpe kutala kana Nzambi simbaka Ndinga na Yandi samu na bana yina ya kimuntu, yina vwandaka Isaac. Beto tala fioti ya bana yina ya kimuntu yina kwikilaka ba nsilulu nionso ya Nzambi mpe kuvwandaka ata na kivuvu mosi ve. Ntangu yayi bambuka, yawu vwandaka mbala mafunda na mafunda fokula mbala mafunda na mafunda bayina bákaka nzengolo ya kibakala mpe mambu yina nionso yankaka, mpe vwandaka kaka ve Nkuna ya Abraham. Kieleka, “Yina kele Juif ya nganda mpamba kele Juif ve; kasi yina kele Juif na kati.” Bawu, mingi kati na bawu, kubwaka, kubwaka na nsi mingi.

⁸⁰ Beno tála, na kati ya ntoto ya kuyuma ya kukonda masa, bawu tubaka: “Beto . . .” Kilúmbu ya Paki, to na kunwa masa na yintó, Santu Jean 6. Bawu vwandaka yangalala.

81 Yesu tubaka: “Munu kele Ditadi yina vwandaka na ntoto ya kuyuma ya kukonda masa. Munu kele Dimpa yina me katuka na Nzambi, na Zulu, kana muntu yina ke dia yawu yandi ke fwà diaka ve.”

82 Bawu tubaka tí: “Batata na beto kudiáka mana na ntoto ya kuyuma ya kukonda masa, bamvula makumi yiya.”

Yandi tubaka tí: “Mpe bawu kele, bawu nionso, me fwàka.”

83 *Kufwàka*, baka ngogo yina mpe longuka yawu, tala yinki yawu kele tuba, “Kukabwana ya kukonda nsuka.” Kasi, bawu vwandaka bana ya Abraham. *Kufwà* zola tuba “kukabwana, kubebisa, kubebisa nionso, kubebisa.” Yesu tubaka tí bawu fwàka, mosi na mosi na bawu, ata ti bawu vwandaka ba Juif yina me bakaka nzengolo ya kibakala.

84 Beno me mona, bankundi na munu ya bansukami, samu beto kele ba Methodiste, ba Baptiste, ba Presbytérien, kusala mwa mfunguna, mpe mambu ya mutindu yina; diabulu kele kwikilaka yawu mpe mutindu beto ke salaka yawu.

85 Kasi nge fwana kukitadisa na Yawu. Nzambi lenda ndimisa Yawu na nzila na yawu, na kukángaka yawu na Mpeve-Santu. Yawu kele diambu ya Ndinga ve!

86 Kana beno túba tí: “Mbote, ntangu yayi, yina vwandaka samu na bilúmbu yina me luta,” kima mosi kele mbote ve.

87 Yinki ke salama kana muntu mosi kele kwenda ntinu, mpe nge tubila yandi tí mwinda ke pela, mpe yandi kulumuka tii na nsi ya kave, mpe kutuba: “Mu me manga yawu. Mu me manga yawu. Kele na kima mosi ve mutindu mwinda. Munu ke kwikila yawu ve?” Yawu ke mona na tí kima mosi kele mbote ve na muntu yina. Kima mosi lenda vwanda mbote ve na yintu na yandi. Kana yandi me manga nsemo yina ke kebisa yandi mpe yinto ke pesa luzingu, lenda vwanda na kima mosi ya tambula mbote ve, na mabanza na yandi.

88 Mpe kana muntu mosi me mona Ndinga ya Nzambi, me monisama mpenza na ntwala na yandi, mpe me tadisama, mpe yandi me kukikánga mpe me kulumusa ba rideau ya denomination ya yandi, kele na diambu mosi ya imbi na muntu yina, na kimpeve. Kele na kima mosi ya yimbi na yandi. Kele na kima mosi ya yimbi na kimpeve. Yandi lenda kuyamba Yawu ve. “Kifwà-meso, mpe yandi zába yawu ve,” kele kwenda na Lusambusu, mpe Nzambi ke vwanda Zuzi.

89 Tala mbote na ntangu yayi bawu—bawu salaka yawu, mpe bankuna yina na ntangu yayi kele bayina kwikilaka Yawu, tala yina salamaka. Beto tala mwa ndámbu na bawu ntangu yayi, nkuna ya Abraham.

90 Beto tala bana Hebreux, samu bawu telemaka na kièléka mpe bawu lendaka ve kundima kusambila kiteki. Bawu mangaka na kufukama na ntwala ya kiteki yina ntinu ya mbanza

salaka. Yawu salamaka na kifwanisu ya muntu mosi ya santu, mpe, kifwanisu ya Daniel.

⁹¹ Yawu monanaka tí Bantu ya makanda vwandaka nata yawu na lweka mosi ya yimbi, ya kufukimina kifwanisu ya muntu mosi ya santu. Yawu ke salama mutindu mosi, na ntangu bantu ya makanda ke tindama na kingolo-ngolo na kufukimina bifwanisu ya bantu. Yawu ke kwisa na kumonisama, ya Daniel vwandaka na yawu ya kutendúla Ndinga, yina sonamaka na diboko yina sonikaka na kibaka. Tala nzila yina yawu ke kotaka, mutindu mosi kaka yawu ke basikaka, mutindu mosi, yina kifwanisu ya Bantu ya makanda.

⁹² Tala mbote, bawu mangaka na kusala yawu. Mpe yinki bawu salaka? Bawu vwandaka bana ya Abraham bayina bikalaka na kieleka na Ndinga, mpe bawu bakaka kielo ya bambéni na bawu, na tiya. Bawu salaka yawu. Mbote, Ndinga ya Nzambi kele kièléka.

⁹³ Daniel, mekamaka samu na kufukimina Nzambi mosi ya kièléka. Yandi mekamaka samu na yawu. Mpe na ntangu ya kumekama, yandi teleminaka kumekama yango. Mpe yinki Nzambi salaka, yawu monanaka mutindu tí yandi kumaka na nsuka samu na yandi, mutindu beto lenda túba? Mpe bawu zábaka ve yinki kusala. Bawu vwandaka nata yandi samu na kukaba yandi mutindu madia ya bankosi. Kasi Daniel bikalaka na kieleka na kumekama, tí Nzambi ya kièléka kele kaka mosi, mpe yandi bakaka kielo ya bambéni na yandi. Nzambi kangisaka yinwa ya bankosi.

⁹⁴ Moize bikalaka ngwí na Ndinga ya nsilulu, na ntwala ya ba imitateur ya luvunu, Jambres na Janes, na kati ya kumekama. Tala, Nzambi kutanaka na yandi, na kimpeve, yandi tindaka yandi na kwenda kusala bidimbu yina, kusongisa bidimbu yina, mpe konso kidimbu lendaka kaka kuvwanda na Ndinga mosi. Moize kwendaka mbala mosi tii kuna, ya kièléka kaka mutindu yandi zábaka. Yandi losaka nkawa na yandi na ntoto, mpe yawu kitukaka nioka. Beno zába yinki salamaka? Awa kwisaka imitateur mpe salaka mutindu mosi.

⁹⁵ Ntangu yayi, Moize nangúlaka ve maboko na yandi na zulu, na kutba tí: “Mbote, mu banza tí yawu kele yimbi.” Yandi bikalaka kuna mpe yandi vingilaka Nzambi. Yandi bikalaka ya kièléka. Yawu tadilaka ve yina imitateur vwandaka, yandi talaka na kièléka. Mpe ntangu yandi bikalaka kaka kièléka na lubokilu na yandi, ya kunata bantu yina na nganda ya kisika yina, na ntangu masa pasulaka nzila, Nzambi salaka tí yandi baka yawu, mpe yandi kangulaka kielo na Dituti ya Tiya yina vwandaka tambwisa yandi. Yandi nataka bantu tii kuna na yinsi ya nsilulu.

⁹⁶ Josué, ntwadisi ya nene yankaka. Kaka zole na kati ya . . . kwendaka na yinsi ya nsilulu, Josué ti Caleb. Bawu kumaka

na kisika mosi na nkumbu ya Kadesh, yina vwandaka kati-kati ya yinza na ntangu yina, yawu vwandaka mutindu kiti ya lusambusu. Mpe, oh, bawu tindaka banongi kumi na zole samu na kutala ntoto, mpe kumi na zole na bawu vutukaka.

⁹⁷ Kumi na kati na bawu tubaka tí: “Oh, yawu kele kisalu ya mingi. Beto lenda sala yawu ve. Mbote, samu na bantu yina, beto kele mutindu makonko na ntuala ya bawu.”

⁹⁸ Kasi yinki Josué salaka? Yandi vwandisaka dikanda pima. Yandi tubaka tí: “Beno vingila fioti. Beto me lunga na kubáka bwala yina, ata ti beto kele fioti na ntuala na bawu, ata ti beto kele fioti na lutangu.” Yinki yandi vwandaka sala? Yandi vwandaka kutelema ya kiéléka na kati ya nsilulu yina, “Mu me pesa beno yinsi yayi,” kasi beto lenda nwanina kitini mosi na mosi na yawu.

⁹⁹ Nge ke kwikila yawu, mama? Nzambi me pesaka nge kubeluka na nge, kasi nge lenda nwanina kitini na yawu mosi na mosi. “Kisika nionso yina ya makulu na beno ke diata, mu me pesa beno yawu.” *Makulu* zola tuba “kubaka”. Yawu kele ya kieleka ya nge na muvimba na yawu, nsilulu mosi na mosi kele ya nge, kasi nge lenda nwanina konso kitini ya nzila na yawu na ntangu yayi.

¹⁰⁰ Ntangu yayi, Josué zábaka yinki Nzambi tubaka. Yandi vwandaka nkuna ya Abraham. Beno me mona? Yandi tubaka: “Munu ke kwikila tí, Nzambi pesaka beto yinsi yayi, mpe beto me lunga mpe na kubaka yawu.” Mpe mutindu yandi nungaka kumekama, na ntuala ya dikanda ya muvimba ya bana Israel, makanda nionso mpe bantu nionso bokutaka mpe dilaka. Josué tubaka na bawu tí: “Beno vwanda swi! Nzambi pesaka nsilulu.”

¹⁰¹ Yawu ke tadila ve nene yina nge kele, to yinki mutindu bantu me telemina nge, mpe yinki ba docteur me tuba, Nzambi pesaka nsilulu. Yawu me tadila Nzambi na kusala yawu.

¹⁰² Yinki yandi salaka? Ntangu ya bawu kumaka na nzadi Jourdain, yandi bakaka kielo. Tala yina yandi—yandi salaka.

¹⁰³ Jerico, ya kukángama mutindu kafulu na kati ya kimpusu. Yinki yandi salaka? Yandi bakaka kielo.

¹⁰⁴ Ata ti kilúmbu mosi kuna mbéni na yandi vwandaka kusosa na kukánga yandi, yandi bakaka kielo ya mbéni na yandi na mutindu tí yandi tubaka na mwini na kutelema mpe yawu telemaka. Mpe ntangu lemvukilaka yandi, mpe yawu nikanaka ve kitamina ya ntangu makumi zole na yiya.

¹⁰⁵ Nzambi kele kiéléka na nsilulu na Yandi, kukonda kutala yinki Yandi ke sala; kubika Mazulu ya mpamba na ntuala Yandi kukonda kubedisa Ndinga na Yandi. Ata mbala mosi ve Yandi me salaka nsilulu mpe yawu salama ve. “Mu kele Mfumu yina ke belulaka bimbevo na nge nionso. Kana bawu tetika maboko

na zulu ya bambevo, bawu ke beluka.” Amen. “Kana nge lenda kwikila, mambu nionso lenda salama.”

¹⁰⁶ Josué kwikilaka yawu, yawu yina Nzambi telemisaka ntoto na kukonda kubaluka. Telemisaka yawu na mwa Ngolo yankaka mosi, ngolo na Yandi Mosi; yina salaka tí ntoto kubalukaka diáka ve na kitamina ya ntangu makumi-zole na iya, tii kuna Josué manisaka bambéni na yandi. Yandi bakaka kielo na bawu. Ya kiéléka, yandi salaka yawu. Nzambi kele ya kiéléka.

¹⁰⁷ Ntangu yayi, mu ke banza tí beto ke na ntangu ya kutubila mingi ba héro, kasi mu ke kaka na muniti kumi ntangu yayi. Tala, ba héro yayi nionso ya kulutila mbote, mutindu ya bawu vwandaka, mpe binwani mvita ya lukwikilu, bawu nionso fwàka na kielo ya lufwa. Bawu nionso kufwàka, na kielo ya lufwà.

¹⁰⁸ Na yawu tala kwisaka Nkuna ya Kimfumu ya Abraham. Bawu nionso vwandaka bana na yandi, na nzila ya Isaac. Kasi tala Nkuna ya Kimfumu ya Abraham, yina vwandaka Klisto, Nkuna ya Abraham na lukwikilu; bayina beto lenda vwanda, tala kaka kana beto kele yawu to ve. Nkuna yina ya kimuntu vwandaka kaka kifwànisu. Bayina yankaka nionso butukaka lubutuku mosi mutindu bantu nionso, kasi Yandi kwisaka na lubutuku ya bumwense. Beno me mona, yawu vwandaka ve nkuna ya Abraham, kuna, na ba Juif. Yandi kwisaka na nzila ya nkuna ya lukwikilu ya nsilulu. Mpe, tala, beto lendaka tangama mutindu tí beto kele bana na Yandi, na nzila ya Bakala yayi.

¹⁰⁹ Tala yina ya Yandi salaka. Ntangu Yandi vwandaka na ntoto, Yandi nwanaka mpe bakaka konso kielo ya mbéni vwandaka na yawu; Nkuna ya Kimfumu. Yandi silaka yawu na Ndinga. Yandi nungaka yawu. Yandi nungaka kielo ya kimbevo, samu na beto. Tala yina Yandi kwisaka sala. Yandi, bambuka, bambevo, Yandi bakaka kielo. Beno lenda diáka ve kubaka yawu; Yandi salaka yawu. Ba bakala yina yankaka lendaka nwana na kubaka bielo na bawu mosi. Kasi beno lenda sala yawu ve; yawu me salamaka ntama. Yandi nungaka biélo ya kimbevo. Mpe yinki Yandi salaka ntangu Yandi bakaka biélo ya kimbevo? Na kutúbaka tí Yandi lenda. . . Konso kima yina beno ke lomba awa na ntoto, mpe konso kima yina beno ke kanga awa na ntoto, Yandi mpe ke kanga yawu na Zulu, pesa beto bafungula ya kielo.

¹¹⁰ Yandi nungaka kielo ya mpukumuna, na Ndinga. Mpe ba fungula vwandaka, “Telemina mbéni na nge, mpe yandi ke tina ntama na nge.” Yandi nungaka yina nionso; nungaka bimbevo nionso.

¹¹¹ Yandi nungaka lufwà, mpe Yandi nungaka difelo. Yandi nungaka lufwà na difelo. Yandi nungaka yina bayankaka lendaka ve kununga, samu bawu vwandaka nkuna yina ya kimuntu. Yayi kele Nkuna yina ya kimpeve. Yandi nungaka kielo ya maziame, mpe vumbukaka na lufwa na kilumbu ya tatu, samu na lunungu ya beto.

¹¹² “Mpe ntangu yayi beto kele ya kulutila ba héro.” Beto kele kukikotisa kaka na kati na yawu, mutindu kimvwama, “Ya kulutila héro.” Ntangu yayi beto kele na diambu na mbéni mosi yina me nungamaka. Kimbevo me nungamaka. Lufwà me nungamaka. Difelo me nungamaka ntete. Bima nionso me nungamaka. Oh, lala! Munu zolaka kuma ndà mbàlà zole, ntangu yayi mu ke kukiwa mbote mbala zole. Beto ke nwanisa mbeni yina me nungamaka ntete.

¹¹³ Kukonda kuyituka Paul lendaka túba tí, ntangu bawu vwandaka kutunga kisika ya nene, samu na kuzenga yintu na yandi, yandi tubaka: “O lufwà, wapi ntunga na nge? Songa munu kana nge lenda pesa munu boma mpe munu kuboka. Maziami, wapi lunungu na nge, mpe nge banza tí nge ata kupodisa munu kuna? Munu ke songisa nge mosi yina kele ya mpamba kuna; mpe munu kele kati na Yandi, Yandi ke vumbula munu na lufwa na kilumbu ya nsuka.” Mbéni yina me nungamaka!

¹¹⁴ Nkuna ya Kimfumu ya Abraham! Ntangu yayi, nkuna yina ya bumuntu lendaka ve kutadisa Yawu. Kasi Nkuna ya Kimfumu lendaka kununga yawu, ntama yawu nungamaka, samu Yandi yitaka kwenda na ntuala na beto mpe nungaka konso kielo samu na beto. Yandi kele ntangu yayi, na manima ya bamvula mafunda zole, Yandi me telema na kati na beto, Hero ya kulutila ngolo. Yandi me nunga kaka kimbevo ve... Yandi nungaka kimbevo. Yandi nungaka mpukumuna. Yandi nungaka mbeni mosi na mosi. Yandi nungaka lufwa. Yandi nungaka difelo. Yandi nungaka maziami, mpe vumbukaka diaka na lufwa. Mpe bamvula mafunda zole na manima, tala Yandi yayi me telema na kati na beto, na nokila yayi, na kukimonisaka Yandi-mosi, Hero ya kulutila ngolo! Amen. Yandi kele kaka awa, ya moyo, na kusiamisaka bansilulu na Yandi, Nkuna ya Kimfumu ya Abraham! Oh, la la! Mpe bambeni ke . . .

¹¹⁵ “Yandi ke baka bielo ya mbéni na yandi.” Na ba yina, Nkuna, Yandi me telema awa samu na kukisongisa Yandi mosi na ba nani? Ba Nkuna yina yitaka solama ntama lenda mona yawu. Yandi nungaka yawu. Nani, na manima ya kumekama na yandi, ya Ndinga ya nsilulu, bawu tulamaka kidimbu na Mpeve-Santu, na kati ya Nzutu ya Klisto, na bawu yawu lungisamaka (yinki?) Ba Hebreux 13:8 yawu kele mutindu yina. Bawu me tulama kidimbu ya kati na Mpeve-Santu, Mpeve-Santu yina ya vwandaka na . . . Abraham yitaka mona yawu; na lukwikilu yandi ndimaka yawu. Mpe ntangu yayi beto me kuzwa Yawu, na kutalaka na manima na nsilulu yina Yandi pesaka. Mpe Jean 14:12 me ndimama na bilumbu yayi ya nsuka, na mvumbukulu ya Héro ya mvita ya ngolo, Yandi-mosi.

¹¹⁶ Yandi ke sala ve mambu mosi ya bantu; kasi Muntu mosi, Klisto, Hero. Kele yinzo-Nzambi na munu ve ya ba Baptiste, to ya beno ba Presbytérien, to ya Méthodiste, to ya ba Pentecotiste, kele na nzila na yawu ve; kasi na nzila ya Yesu Klisto. Yandi

kele zinga bubu yayi. Yandi me tèlema na zulu na yawu, samu na kunungisa na beto.

¹¹⁷ Mpe samu Yandi kele zinga, Yandi tubaka tí beto mpe ke zinga. “Muntu ke zinga kaka na mampa ve, kasi na konso Ndinga,” ndámbu ya Ndinga ve, “konso Ndinga yina ke basika na yinwa ya Nzambi.” “Mu ke Mvumbukulu mpe Luzingu. Yina ke kwikila na Munu, ata mpe yandi me fwà, yandi ke zinga. Yina nionso ya ke zinga mpe kele kwikila na Munu ke kufwà diaka ve. Nge ke kwikila na yawu?” Kubaka konso kielo ya mbéni na nge!

¹¹⁸ Yinki mutindu yandi lendaka baka yawu Bosworth, ntangu Nzambi. . . Bosworth vwandaka na kati ya Hero ya mvita. Mpe tala kikuma yandi ke tuba tí: “Ntangu ya kiesa mingi na luzingu na munu kele ntangu yayi.” Ah-ah. Yandi zába Hero ya Mvita yina ya ngolo nionso. Kivuvu na yandi nionso ke na Yandi. Oh, la la! Ntangu yayi beto lenda yimba:

Na luzingu, Yandi zolaka munu; na lufwa,
Yandi vulusaka munu;
Na kuzikama, Yandi nataka ntama masumu na
munu;
Na mvumbukulu, Yandi nungisaka munu
kukonda ntalu:
Kilumbu mosi Yandi ke kwisa—oh, kilumbu ya
nkembo!

¹¹⁹ Na bayina ke mona na ya kunungama. Eddie Perronet, mu banza tí vwandaka, yandi lendaka ve kuteka bamikunga na yandi ya Buklisto. Muntu mosi ve zolaka yawu. Bawu vwandaka na kima mosi ve ya kusadila yawu. Oh, ya kunungama, mpe mukwikidi! Kilumbu mosi, Mpeve-Santu kwisaka na zulu na yandi. Kielo ya mbeni na yandi, yina lendaka ve kundima bisono na yandi! Mpeve bulaka yawu, mpe yandi bakaka kilapi, Nzambi pesaka yandi nzila na kusonika mukunga ya ntete-ntete.

Nionso kumisa ngolo yina kele na Nkumbu ya
Yesu!
Bika Bawanzio kufukimina;
Samu na yawu nata yimpu ya kimfumu,
Mpe kulwatisa Yandi Mfumu ya nionso.

¹²⁰ Kifwà-meso Fanny Crosby, mbàlà mosi. Tubaka tí: “Yawu zola tuba yinki samu na nge?” Ndámbu. . . Yandi tekaka ve kinkuluntu na yandi mutindu salaka Elvis Presley mukwikidi yayi ya dibuundu ya Pentecote, to mutindu salaka Boone yina ya dibuundu ya Klisto, to diaka mutindu Red Foley salaka, na kutekaka makabu na bawu na yinza; bawu me sumba ba voiture Cadilacs, na bamilion ya ba dollar, diske ya wolo. Kasi Fanny Crosby bikalaka ya kiéléka na kisika na yandi. Yandi bokaka ngolo tí:

Kuluta munu ve, O Mvulusi ya ngemba,
Wà bidilu na munu;
Ntangu Nge ke bokila ba yankaka,
Kubika munu ve.

Nge kele Yinto ya ngolo na munu nionso,
Ya kulutila luzingu samu na munu,
Nani ya munu kele na yandi na zulu ya ntoto
mutindu Nge?
To na nani na Zulu kana Nge ve?

121 Bawu tubaka: “Yinki ke vwanda nge kifwà-meso ntangu yina nge ke kuma na Zulu?”

Yandi tubaka: “Munu ke zába Yandi, konso mutindu yina.”

Bawu tubaka tí: “Nki mutindu nge ke zába Yandi?”

Yandi tubaka tí: “Munu ke zába Yandi.”

Bawu tubaka tí: “Madame Crosby, nge lendaka kuma na bamilion ya ba dollar.”

Yandi tubaka: “Mu ke na nsatu ya ba millions ya ba dollar ve.”

122 “Yinki mutindu nge ke zaba Yandi?” Yandi tubaka tí:

Munu ke zaba Yandi, Mu ke zaba Yandi,
Mpe munu me sumbuluka na lweka na Yandi
mu ke telema;
Munu ke zaba Yandi, Mu ke zaba Yandi.

123 “Kana mu lenda mona Yandi ve, mu ke simba bidimbu ya bansonso na maboko na Yandi.” Yandi nungaka kielo ya mbéni na yandi. Yinga.

124 Kana nge kele kati na Klisto! Yandi tubaka: “Kana nge me zinga na Munu, mpe Ndinga na Munu me zinga na kati na nge; lomba fungula nionso yina nge ke na yawu nsatu, lomba konso kielo yina nge ke zola baka; lomba yina nge ke na yawu nsatu, mpe yawu ke pesama na nge. Kana nge me zinga na Munu, mpe Ndinga na Munu me zinga na kati na nge, nge lenda baka kielo nionso ya mbéni yina ke kwisa na ntwala na nge.” Nge kele Nkuna ya dikanda ya Kimfumu ya Abraham.

125 Yinki mutindu kielo yina me telema na ntwala na nge? Kana yawu kele kimbevo, nge me luta munungi samu na yawu. Na yawu beto lenda tuba, yimba mukunga yayi ya lemvo ya nkulu:

Konso Nsilulu na Buku kele ya munu,
Konso kapu, konso nzila . . . mpe Kinzambi,
Mu ke kwikila na zola na Yandi ya Kinzambi,
Samu konso nsilulu na Buku kele ya munu.

126 Beto kele ya kulutila munungi, mpe Nkuna ya dikanda ya Abraham lenda baka kielo ya mbéni! Ntangu ya bawu ke tuba tí Mambu yayi lenda salama ve, ntangu bawu ke zola bokila Yawu ya diabulu, to ya Bezebul, to kima mosi ya nkaka,

Nzambi kele ya kieleka na kiyeka ya kubotula konso kielo mpe kukanga mbéni.

Beto sambila.

¹²⁷ Mfumu, bika tí Nkuna ya Abraham . . . munu zába tí bawu ke mona Yawu, Mfumu. Yinki mutindu Ndinga yayi lenda kubwa kukonda Ntoto ya mbote? Mu ke sambila tí bawu bakula yawu ntangu yayi. Bika tí konso muntu yina ke kwisa na ndonga ya bisambu kubeluka.

¹²⁸ Mfumu, kana kele na ba yankaka awa, bayina me sala ntete ve kimbangi na bawu, bayina me telemaka ntete ve puelele na ntwala ya bantu mpe kutelema samu na Klisto, bayina me yilama samu na kumanga malongi ya bantu mpe ya madidi, ya mutindu ya nganda, bima ya kufwà yina ke nata bawu ntama na Nge. Mpe bika tí bawu telema awa ntangu yayi, mpe bawu tuba: “Mu ke ndima Yandi mutindu Mvulusi na munu.” Na yawu Nge ke telema samu na yandi na Kilumbu yina.

¹²⁹ Mutindu ya beto kele na bayintu na beto ya kuniékisa, kana kele na bantu ya ke zola telema kaka na mwa ntangu fioti, samu na kisambu, túba: “Mu zola telema samu na Yandi ntangu yayi, na yawu Yandi ke telema samu na munu na Kilumbu yina, na Ntwala na Yandi ya Bunzambi.” Munu ke lomba beno, munu me pesa beno ntangu ya mbote tí bankumbu na beno kusonama na Buku ya Moyo, kana beno zola telema. Mu ke lomba beno ve na kukóta na dibuundu mosi. Mu ke lomba na beno na kukwisa na Klisto, kana beno kele awa mpe beno zába Yandi ve.

¹³⁰ Nzambi kusakumuna nge, mwana yayi ya bakala. Muntu yankaka kele, tuba: “Mu—mu ke zola telema ntangu yayi.” Nzambi kusàkumuna nge, mwana-kento. Nzambi kusàkumuna nge, mpangi ya kento. “Mu zola . . .” Nzambi kusàkumuna nge. Nzambi kusàkumuna nge. “Mu me tèlema, na nkokila yayi.” Bantu yayi nionso ya mbote, bakento na babakala, me telema awa, “Mu me telema, na nkokila yayi.”

¹³¹ Mpe na kilumbu yina ntangu munganga ke tuba tí: “Mbote, kisumbula; menga na yandi kele basika, lufwà kele na zulu na bakala, to na zulu ya kento.” To, na súka mosi, nge ke bambuka kutelema na nge. Nge me telema samu na Yandi ntangu yayi.

¹³² “Kana nge me wa Munu nsoni na ntwala ya bantu, Munu mpe ke wa nge nsoni na ntwala ya Tata na Munu na Bawanzio ya santu. Kasi kana nge tuba kimbangi na meso ya bantu tí nge zába Munu, Munu mpe ke tuba kimbangi na ntwala ya Tata na Munu na Bawanzio ya santu.”

¹³³ Nzambi kusakumuna nge, mpangi na munu ya kento. Kele na bantu kisika mosi kuna na balcon? Kaka ntangu yayi, ya beto ke vingila. Bayankaka, diaka na kiringa ya nene? Yawu kele mbote. Mu me kanga beno na Ndinga ya beno mosi, nkundi na munu.

134 Kana Ndinga me bwa na Ntoto ya mbote, mutindu mwana kento yina na dibulu ya masa, yandi—yandi bakulaka. Yandi tadisamaka na Zulu, kubanda... na ntwala ya kusalama ya yinza. Na ntangu Nsemo yina bulaka Yawu, yandi zabaka Yawu.

135 Nzambi kusakumuna nge, mpangi na munu ya bakala. Yandi kele muntu ya kikesa... Nzambi kusakumuna nge, mpangi na munu ya bakala. Nge lendaka kusala ata ti mambu ya kulutila nene na luzingu na nge; nge ke sala kima mosi ya kulutila nene yina nge me salaka ntete ve, ntangu yayi, telema samu na Klisto.

136 Tata na beto ya kele na Zulu, Nkuna me losama na zulu ya ba ntoto ya mutindu na mutindu, na nkokila yayi. Beto ke mona Luzingu kubasika. Ba bakala na bakeno ya me telema awa, mpe disu ya Nzambi yina ke monaka bima nionso, Yandi yina kele bisika nionso, ya kuzaba mambu nionso, yina kele na ngolo nionso, kumina bawu. Bawu kele ya Nge, Tata. Mu ke tadisa bawu na ntwala na Nge ntangu yayi, mutindu ba yimpu ya lunungu.

137 Bika tí luzingu yayi ya bawu me lutisa awa ntangu yayi, na kuzaba yinki bawu me sala, na kuzaba yina yawu zola tuba, tí bawu me telema samu na kubaka lukanu na mwa bantu yina Mfumu me losamaka. Bika tí bawu bikala kaka na kieleka tii kuna na Kilumbu ya bawu ke telema na Ntwala na Nge, samu na yawu Ndinga yina ya mawete ke tuba: “Yinga, kilumbu mosi kuna na Baton Rouge, to na kisika mosi ya fioti yina ba ke bokilaka Denham Springs, yandi telemaka samu na Munu, Tata, ntangu yayi Mu ke telema samu na yandi, bakala to kento.” Ndima yawu, Mfumu. Bawu kele ya Nge, na Nkumbu ya Yesu. Amen.

Nzambi kusakumuna nge, samu na kutelema na nge. Nzambi ata...

138 Ntangu yayi sala diáka kima mosi yayi samu na munu. Tala, kana nge kele pene-pene ya mosi na ba pasteur, tala fioti, solula na bawu. Kana nge me bakaka ntete mbotika, na mbotika ya Buklisto ve, sala yawu. Kukikotisa nge mosi na kati ya ba kwikidi ntangu yayi, bakwikidi ya kieleka, mimpani ve; kasi bakwikidi ya kiéléka.

Ntangu yina ya beto kele sambila, bika tí beto sambila samu na bamuswale yayi.

139 Tata ya Mazulu, ba muswale yayi ke kwenda na nganda ntangu yayi; wapi kuna, munu zaba ve. Mbala yankaka tata mosi ya mununu ya kifwa-meso yina me vwanda kisika mosi kuna ya mwa poto-poto, ke vingila muswale na yandi kuvutúka; to mwana mosi ya fioti yina me lala kuna na mbeto ya hopital; mpe mama mosi me telema, ntima me súka, ke vingila kuvutuka ya muswale. Tata ya Mazulu, munu ke bondila ti Nge kwenda na yawu. Mpe samu na kidimbu ya Kuvwanda na Nge na kati na beto bubu yayi, mpe lukwikilu na beto na Nge na mutindu ya

beto me longa Ndinga na Nge, bika tí lukwikilu yina vwandaka na Abraham, mpe lukwikilu yina basikaka mpe pesamaka na beto na nzila ya Yesu Klisto, bika tí yawu kwenda na bamuswale yayi mpe kubelula konso muntu yina bawu ke tula yawu. Beto me tinda yawu, na Nkumbu ya Yesu. Amen.

¹⁴⁰ Ntangu yayi kaka mwa ntangu fioti, na ntwala beto kubokila ndonga ya kisambu. Nzambi ya munkwa ngolo ya ntangu nionso mpe ya ngolo nionso, Yina ya kulutila nene, Yina me lungaka na yandi mosi. . . Mu ke bondila beno bankundi, mu—mu ke banda na kusambila samu na bambeo, mpe mu. . . Mbala yankaka, ntangu ya beto ke kulumuka kuna, mu—mu ke kuka diaka ve kutuba kima mosi na beno; mingi ke kwenda na ntwala ya ntangu yina. Nge vwanda nani, kana nge telemaka ata fioti ve na mwa ntangu me luta, mpe nge ke kwikila ve. . .

¹⁴¹ Kana nge ke mukwikidi ya dibuundu mosi, yawu kele kima ya mbote, kasi yawu me lunga ve. Beno me mona ntwenia yina ya bakala ya mfumu vwandaka mpe mukwikidi ya dibuundu. Beno me mona? Yandi yuvulaka Yesu yinki yandi lendaka kusala na kuzwa Luzingu ya Kukonda nsuka. Yandi ndimaka Yawu ata fioti ve. Yandi landaka nzila na yandi. Yinki kima ya buzoba salaka mwana bakala yina. Kulanda mbandu na yandi ve. Beno me bambuka ntangu ya nsuka ya yandi tadisamaka? Ntangu fioti, yandi vwandaka ya kufúlúka na bumvwama ya mingi. Yandi kumaka mvwama ya nene. Yandi kumaka na kisika mosi tii ata bayinzo na yandi ya kubumba madia kufulukaka mingi. Kasi beto me mona kufwanisama na yandi ya nsuka, na difelo, tiya ya mpasi. Kumeka ve, kumeka ve kubika tí yawu kumina nge. Ndimba Klisto.

¹⁴² Beno bana ya fioti, beno bana bakento, beno ba toko, na kati-kati ya luzingu, mu ke bondila beno na kusala yawu. Beno kuwa munu, mutindu—mutindu mpangi ya beno ya bakala, mosi na bayina ke zolaka beno. Munu kele awa samu mu ke zolaka beno. Mu ke zolaka Nzambi, mpe mu ke zolaka beno, mpe munu lenda zola Nzambi ve kana mu ke zolaka beno ve.

¹⁴³ Tala yina munu zola, kana beno zola tuba mambu ya mbote, beno tuba yawu samu na mwana na munu ya bakala kuna to, to na mosi ya bana ya munu. Bika munu kaka. . . munu, mu ke kwenda na yawu ve. Bibuti nionso ke sala mutindu yina; mutindu mosi na Nzambi. Beno me mona? Beno zola bantu na Yandi. Beno zolana beno na beno.

¹⁴⁴ Beno ke tuba: “Samu na yinki nge kele kunganina bawu?” Zola ya kieleka kele vutulaka muntu na nzila ya mbote.

¹⁴⁵ Kana mwana na nge ya fioti me vwanda na bala-bala; mpe nge tuba: “Mbote, Junior me vwanda kuna. Yandi lendaka kusala yawu mutindu yina ve, kasi mu zola ve tí nge lwadisa ntima na yandi ya fioti.” Nge ke zolaka yandi ve. Bawu ke kufwà yandi kuna. Kana nge ke zolaka yandi, nge ke nata yandi na lupangu

mpe nge ke bula yandi mpe kupesa yandi ndola ya ngolo. Nge ke sala tí yandi kutumama.

146 Tala mutindu Nzambi ke salaka. Zola ke vutulaka muntu na nzila, tala zola ya kieleka.

147 Ntangu pasteur to longi mosi ke telema mpe ke yambula beno bakento na kuzengisa bansuki na beno, mpe kukipakula-pakula na kulwata bima ya mutindu na mutindu, mpe yandi ke nganina beno ve, zola ya kieleka kele ve na kisika yina; mpe lenda basisa yawu ve. Mpe ke bika beno babakala na kukwela mbala tatu, mbala yiya, mpe mambu yina nionso yankaka, mpe beno ke kangama na yawu, zola ya kièléka kele ve kisika yina. Bika tí nge kóta na dibuundu mosi, mpe bawu bula nge mwa mbata na mukongo, mpe bawu lamba nge na mwa malongi na bawu ya kimuntu, mpe, “Tala yina nionso ya nge vwandaka na yawu na kusala, kele kukota na dibuundu ya santu,” zola kele ve kuna. To, ntangu yankaka, muntu me zimbana kaka nzila ya muvimba, yandi mosi, ke mona yawu ve.

148 Zola ya kieleka kele sùngikaka, mpe vutula nge na Ndinga ya Nzambi.

149 Tala Yesu, yinki mutindu, yinki Yandi tubaka, samu Yandi zolaka bawu mingi, na mutindu tí Yandi fwaka na kisika na bawu, na ntangu yina bawu vwandaka lomba Menga na Yandi na zulu na bawu.

150 Ntangu yayi bika tí Mpeve-Santu yayi ya nkembo . . . munu zola telema fioti kuna mwa muniti mosi. Mu ke vingila tii kuna kupakulama ya Mpeve-Santu kukotila munu, na ntwala mu banda. Mu me katuka na kulonga. Matondo samu, na lusadusu na beno.

151 Ntangu yayi, konso muntu yina ya kele awa, konso kisika nge kele, na kati ya yinzo yayi, sambila kaka ata muniti mosi, na kutubaka tí: “Mfumu Yesu, sadisa munu! Sadisa munu! Bika munu simba lele na Nge.” Yesu tubaka, beno zaba, na ntangu kento yina simbaka lele na Yandi, Yandi waka yawu ve, na nzutu, kasi Yandi balukaka na maníma mpe bakulaka nani yandi vwandaka mpe yinki yandi salaka. Yandi me bikala kaka Yesu mosi yina na nkokila yayi, Mbuta ya ba Nganga-Nzambi yina lenda simbama na bimbevo na beto.

152 Beno me kwikila, mosi na mosi na beno ntangu yayi, yawu ke kieleka, tí Nzambi pesaka nsilulu yina, mbala mosi diaka (mpe bika tí Yandi songisa yawu) tí beto ke zinga na bilumbu ya Sodome? Yikwa ke ndima yawu, na kati ya yinzo yayi, beno telemisa kaka maboko ya beno.

153 Beto ke zinga, mutindu yawu vwandaka, na Sodome. Mambu nionso me pola mingi, bansalulu ya yinza ya muvimba me beba, mambu nionso, bansalulu ya dibuundu, nsalulu ya politiki. Kele na kima mosi ve. Politiki nionso kele ya kubeba. Bansalulu nionso, bisika nionso, bamfumu na beto ya nkú, nionso me beba.

Bayinzo-Nzambi mpe, mutindu mosi. Mabuta mpe na mutindu ya kubeba. Nionso kaka ya kupola, Sodome!

¹⁵⁴ Na yawu, bambuka, Nzambi zabaka yawu na ntwala na beno, banza Yandi tubaka tí Yandi ke kukimonisa Yandi mosi na nzutu ya muntu, mpe ke sala mutindu mosi Yandi salaka na ntwala ya Sodome, na ntwala ya kwizulu ya Mwana ya nsilulu kukota na kisalu. Yandi silaka na kutinda muntu yina ke kwisa na ntwala ya Mwana yina ya nsilulu, mutindu Yandi salaka na mbala yantete, yawu ke kotisa; mpe Yandi tubaka tí: “Ntangu Mwana ya muntu ke kukimonisa.”

¹⁵⁵ Mu zaba nge ve. Mbote, Mademoiselle Thompson, kimbevo yayi ya gynecologie na bampasi na yawu, nge me kwikila tí Nzambi ke belula nge? Nge lenda kwikila yawu? Nge lenda? Mademoiselle, Mademoiselle Thomas, nge me kwikila tí Yandi ke belula nge? Samu na yawu, telemisa diboko na nge.

¹⁵⁶ Kele na mwana kento mosi yina me vwanda kaka na maníma na nge. Yandi ke sambila. Yandi kele na arthrite.

¹⁵⁷ Mosi yankaka me vwanda kaka pene-pene na yandi, yandi kele na kimbevo ya estomac, yandi ke sambila. Nge lenda zimbisa yawu, nge ke keba yawu ve. Nge ke muntu ya awa ve. Nge me katuka na Mississippi. Beno kele Tata mpe Mama Stringer. Kana nge kwikila na ntima ya muvimba, Yesu Klisto ke belula nge. Kana nge lenda kwikila yawu. Nge lenda sala yawu? Nge lenda kuzwa yawu. Mbote. Telemisa diboko na nge samu tí bantu kumona tí yawu kele nge.

¹⁵⁸ Mu zaba bantu yayi ve. Mu me monaka bawu ntete ve, na luzingu na munu. Nge lenda kwikila, nkundi. Yandi ke kukitadisa Yandi mosi. Beno me ndima yawu, na bantima na beno ya muvimba?

¹⁵⁹ Samu na yinki nge me nikisa yintu, tata, mpe nge ke tala munu mutindu yina? Yinga, tata. Samu nge me sala mutindu yina, mu ke tuba na nge na mwa muniti mosi. Nge kele toko mosi ya mbuta fioti na bifu ya mbote yina me vwanda kaka kuna, ke tala munu. Yandi kele tala munu, na kieleka nionso. Yandi ke ndima yawu. Nge ke sambila samu na muntu yankaka yina bawu nwanisaka. Kasi—kasi kikuma ya nge ke sambila, nge kele na nsatu, nge ke sosa mbotika ya Mpeve-Santu. Yawu kele mbote. Uh-huh. Yawu kele mbote. Kana nge lenda kwikila yawu! Mwana-kento, nge ke sosa kisalu. Na lweka yankaka, nge lenda zaba tí mu kele profete ya Nzambi, to musadi, nge kele na operation zole. Yawu me bikisaka nge na mwa kulemba mosi. Mambu yina nionso, kimbevo ya kimpeve. Mu zola tubila nge tí nionso me mana. Lukwikilu na nge me vutula nionso na ndonga.

¹⁶⁰ [Kitini ya mpamba na bande—Mu.] . . . me vwanda pene-pene na beno kuna. Yandi ke sambila. Ke tala awa. Yandi me kuwa nge, mpe nge simbaka Yandi. Mu zaba nge ve, kasi Yandi zaba nge. Kasi mu ke tubila nge kikuma nge vwandaka kusambila.

Nge ke kwikila na ntima na nge ya muvimba? Nge kele na kimbevo ya vésicule biliare, nge ke sambila. Nge ke kwikila tí Nzambi ke belula nge mpe ke pesa nge mavimpi ya mbote? Nge kele Madame Smith. Ya kiéléka. Telemisa diboko na nge.

¹⁶¹ Beno me mona, Yandi ke kukitadisa Yandi mosi. Yinki yawu kele? Yawu kele Nkuna ya Abraham, lukwikilu yina ya Abraham vwandaka na yawu, Mfumu Yesu Klisto kati na beto, na kulungisaka Ndinga na Yandi, na bidimbu ya kele landa yawu.

¹⁶² Nani, bakalati yikwa me bikala diáka samu na kusambila, telemisa maboko, songisa kalati na nge? Oh, mbote beto banda ndonga ya bisambu.

¹⁶³ Beno me mona, beno me bakula yawu? Ntangu yayi mpeve yina kaka ve. . . Yawu ke belula ve. Yawu ke tadisa kaka tí Yandi kele awa. Ba pasteur na beno kele mpe na kiyeka mosi yina ya kusambila samu na bambevo. Bawu ke salaka yawu ve; ve, ya kieleka ve. Kasi bawu—kasi bawu kele mpe kaka na kiyeka mosi yina: “Bidimbu yayi ke landa bakwikidi.”

¹⁶⁴ Ntangu yayi mu zola bankundi na munu ba pasteur awa. (Yawu kele mbote, na kubokila bantu. . .?. . .)

¹⁶⁵ Ba pasteur yikwa ke kwikila na ntima ya muvimba, balongi yina kele awa, ke kwikila? Oh, matondo. Mu ke kukiyufula kana beno ke telema? Beno kwisa awa, telema kumosi na munu kaka mwa ntangu fioti, kaka awa, kusambila samu na bambevo. Beno kwisa kaka mbàlà mosi awa na nsi. Ntangu yayi beno tala kubeluka kele salama, beno tala yinki ke salama.

¹⁶⁶ Mu ke zola tí beno kwisa awa, sala bandonga zole kaka awa. Mu ke kwisa mpe kuna na nsi na mwa ntangu fioti, na kusambila samu na bambevo. Mu ke na nsatu ya ba pasteur yina ke kwikilaka yina zola kukitadisa bawu mosi mutindu bakwikidi, tí, nge ke kwikila, tí kwizulu na nge awa, nge kele zingaka luzingu mosi ya santu, luzingu ya mpembe. Bambuka, tala awa yinki ke salama, kutadisa Nsangu ya mbote ya Klisto!

¹⁶⁷ Mpangi Blair, mu zaba tí nge kele kuna, nge to Mpangi Pat. Beno lenda sala ndonga zole na mutindu ya beno ke salaka yawu ntangu nionso, kana beno zola, nge mpe Mpangi Pat.

¹⁶⁸ Ba pasteur bakwikidi bayina ke kwikila! Ntangu yayi, tala, kana Nzambi lenda kukimonisa Yandi mosi na Ndinga na Yandi, ti Ndinga na Yandi, yikwa zaba yina Biblia tubaka, Yesu tubaka tí, “Bidimbu yayi ke landa bayina nionso ke kwikila na munu. Kana bawu tetika maboko na bawu na zulu ya bambevo, bawu ke beluka”? Ba pasteur, beno me kwisa awa samu na kukitadisa mutindu bakwikidi. Beno kele mutindu yina? Beno kele bakwikidi (mutindu yina ve?), beno lendaka ve kutelema awa. Ntangu yayi yinki Yesu tubaka? “Tala bidimbu yayi ke landa bayina ya ta kwikila.” Munu kele mukwikidi kintwadi na beno.

169 Mu ke kwisa kuna na nsi. Bawu kele bantu na beto, mpe beto kele bamivungi na zulu ya mameme yayi. Mu ke kwisa kuna na nsi na kukangula bawu na filé na beno ntangu yayi, kuvukisa maboko na munu na ya beno. Mpe ntangu bantu yayi ke kwisa, kana nge kele na kima mosi ya mwa ntembe na mabanza na nge, basisa yawu kaka ntangu yayi; na mutindu tí ntangu bantu yayi ke kwisa awa, mosi na mosi na bawu yina ke kwisa awa, mpe beto ke tetika maboko na zulu na bawu, bawu ke beluka. Beno me kwikila yawu na ntima na beno ya muvimba, mosi na mosi na beno?

170 Yikwa kele awa na kati ke sambilaka samu na bantu yankaka ntangu yina bawu ke lutaka awa, telemisa diboko na nge: “Mu ke sambila.”

171 Bambuka, yawu lenda vwanda tata na nge, mama na nge, mwana ya nge ya kento to ya bakala, mpangi ya nge ya kento to ya bakala. Mpe kana ya nge kele ve, kele na muntu mosi, yina ke kwisa na ndonga yayi. Mpe yinki kana yawu vwanda bawu, mpe bawu vwandaka kufwà na cancer, to kimbevo mosi ya yimbi, bakala nge lendaka ve kuvwanda ya kieleka na kieleka? Ya kieleka, beto lendaka.

172 Ntangu yayi, munu ke ndima, yinki mutindu beno ke sala na . . . Ntangu yayi ba yayi na ndonga *yayi* awa, lweka yayi, beno telema lweka *yina*, na kalati ya kisambu. Beno telema na kutalaka na lweka yayi, bayina nionso kele na lweka yayi ya diboko ya kibakala. Ntangu yayi, mutindu ya kusadila, bayina kele na lweka ya diboko ya kimama; nionso ya kukangama, beno me mona, mpe beno ke zaba ve yinki mutindu, yinki beto kele kusala. Kele mbote, bayina nionso ya kele na lweka *yayi* awa, beno telema *kuna*. Ntangu yayi, bayina nionso ya kele na lweka ya diboko ya kibakala, beno kwisa na nzila yayi, samu beno ke kulumuka, kwisa lweka-lweka.

173 Mpe yinki mutindu beno ke kwenda, yinki mutindu bawu ke basika na nganda, Mpangi Borders? Kaka na nganda ya kielo, kwisa mbala mosi na lweka ya yinzo mpe nge kota diaka na kati ya yinzo.

174 Na yawu, na ntangu lweka *yayi* ke bokilama, na mwa baminuti fioti, mpe bawu ke telema. Mpe beto mona ntangu yayi yinki . . . Mbote, bayina na lweka *yayi*, beno baluka na lweka yayi. Beno simba ba kalati na beno ya bisambu, beno kwenda na lweka yayi. Mpe kuna na balcon, beno kulumuka kaka na ndonga samu na kukutana na bawu kuna na zulu na nsuka ya ndonga. Ntangu yayi, bayayi ya diboko ya kimama, beno kwenda na lweka ya diboko ya kimama. Mpe na mutindu yina, beno me mona, mpe beno sala ndonga na beno, mpe beno vutuka na nzila *yayi*; baluka, baluka na nzila *yina*. Beno me mona? Mpe beno sala mpe ndonga na beno mpe beno ke landa nzila yayi kaka lweka lweka, beno ke vukisa yawu ata fioti ve.

175 Mpe na mutindu yina beno ya kele kuna na balcon, beno telema kaka na bisika na beno na banzila, mpe beno landa yawu tii na mutindu ya ndonga kele tambula.

176 Ntangu yayi, kaka ntangu yayi beno banda kupusana na kubanda na manima, mosi na mosi, katuka kuna na manima tii kuna beno ke kuma na ndonga yayi pene-pene *awa*. Pusana kaka pene-pene, na lweka *yayi*, banda kuna tii *awa*, banda kaka na kutambula na kulàndáka ndonga tii *awa*.

177 Oh, yinki lenda salama ntangu yayi! Yinki lenda kusalama ntangu yayi! Yayi ke vwanda ntangu mosi ya mambu mosi lenda salama. Yawu kele mbote.

178 Ntangu yayi, yawu kele mbote, kwenda na manima na nzila *yina*, mpe kóta mbala mosi na ndonga, mutindu yina. Kwenda kaka na ntwala na lweka ya nzila yayi. Tala ntangu yayi nzila yawu yayi.

179 Mpe ntangu yayi na ntangu nge kele telema, bantu nionso kutelema, na ntangu beto ke sambila. Mpe dibuundu yayi kele sambila kumosi na munu, mpe beno ke beluka. Benó vwanda kaka na lukwikilu. Mpe kutula ntembe ve. . .

180 Kwisa kaka nzila yina na kuziunga, na kuvùtúkaka kuna na manima, baluka tii na kukutana na ndonga yayi awa na nsuka. Benó kwisa awa pene-pene, na kusala ndonga mosi ya nene. Kwisa na lweka-lweka na nzila *yina*, mpe sala ndonga mosi. Kele mbote.

181 Bantu nionso kusambila. Vwanda na lukwikilu ya kieleka na ntangu yayi. Kutala kaka ve na kibuka ya bantu mingi yayi. Bambuka tí, beto kele—beto kele na Ntwala ya Yesu-Klisto, yawu ke tala beto na kupesa nkembo na yina Yandi salaka na kati na beto, na kuvwandaka na lukwikilu na Ndinga na Yandi.

182 Ikele mbote. Ntangu yayi yawu ke vwanda kaka mbote. Mu banza tí ndonga yayi ke salama na mutindu mosi ya mbote.

183 Ntangu yayi ntangu ya beto kele ya kutelema, mu ke lomba na muntu nionso, na kati ya yinzo yayi, na kuniekisa yintu na yandi.

184 Mfumu Yesu, yawu me kuma pene-pene na kusalama. Lukanu fwana bakama kaka ntangu yayi. Beto ke kwikila tí Nge kele awa? Beto ke zolaka Nge? Beto kele na lukwikilu, Mfumu, ya kulunga samu na yina beto ke lomba? Bantu yayi me kukitadisa bawu mosi na kutelemaka na ndonga. Mfumu, yawu vwanda ya mpamba ve. Bika tí, Mfumu, bawu kuluta awa, mosi na mosi kaka mutindu tí bawu vwandaka luta na nsi ya Klisto, samu beto zaba tí Yandi kele awa. Mpe beto ke sambila tí bawu kuzwa kubeluka ya bawu. Mu ke ndima tí na bilumbu ke kwisa, bantu yayi ke kwenda mona ba pasteur na bawu, bakento yayi vwandaka na bimbevo ya bukento, kimbevo ya estomac, babakala kele na kimbevo ya prostate, ti bimbevo ya

mutindu na mutindu, bawu ke beluka, na kutubaka tí: “Beno zaba ti, kima yina me katuka,” samu bawu kele na Ntwala na Nge. Bika tí bawu kwisa na ntangu yayi mpe—mpe kubakula tí Nge fwaka samu na bawu. Bawu kele Nkuna ya Abraham, mpe Nge nungaka samu na bawu. Bika tí bawu kwisa mpe kuzwa yina Nge pesaka bawu.

¹⁸⁵ Mpe, Satana, nge me basika puelele na bilumbu yayi, tii kuna nge zába tí nge ke muntu yina me nungamaka. Yesu Klisto nungaka nge na Calvaire. Yandi vumbukaka na lufwa na kilumbu ya tatu, samu na mpulusu na beto, mpe Yandi me telema na kati na beto ntangu yayi. Mpe lukwikilu ya beto ke tala Yandi, mpe vwanda ntama na nge to yina nionso ya nge me salaka. Bika bantu yayi, na Nkumbu ya Yesu Klisto.

¹⁸⁶ [Kitini ya mpamba na kati ya bande—Mu.] . . . ? . . . Beto me sala yawu mutindu Mulongi tindáka beto na kusala. Yikwa na kati na beno me luta na ndonga yina, ke kwikila tí nge ke beluka, telemisa diboko na nge. Munu me vukisa ya munu mpe kumosi na beno.

¹⁸⁷ Yina ya beto vwandaka sala, na nsuka, mutindu kimvuka ya balongi awa; mingi kati na bawu vwandaka na bimbevo, mu zabaka yawu, kasi bawu mekaka na kusala ngolo samu na kukotisa ntete bakwikidi ya mabuundu na bawu, ata bawu kotaka kuna to ve. Bawu kele muvungi ya kieleka. Mpe Mpeve-Santu tubilaka munu tí, “Samu bawu me simbana maboko mosi na mosi.” Beto me vukisa bantima na beto mpe ba filé na beto kisika mosi, mpe bisambu na beto, mbala mosi.

¹⁸⁸ Yesu, belula bawu, mpe. Sala bawu mivungi ya ngolo, ya ngolo na Ndinga ya Mfumu.

¹⁸⁹ Bika tí Nzambi, bampangi na munu ya babakala, bika tí Yandi pesa beno yina nionso bantima na beno ke zola. Bika tí beno sadila Yandi bilumbu nionso, mpe kuvwanda na ngolo ya Nzambi na baluzingu na beno, samu na kukeba kimvuka ya bantu yayi ya kitoko. Bika tí Yesu Klisto, Yina vwandaka na beto, mpe kele na beno ntangu nionso, bika tí Yandi sadila beno Yandi mosi kulutila yina Yandi me sadilaka beno ntete.

¹⁹⁰ Beno bantu, bayankaka na kati na beno vwandaka ya kukangama, mbala yankaka beno me mona luswaswanu ve na mwa ntangu yayi, beno lenda mona luswaswanu ve. Tala yina Abraham salaka. Kusala ata luswaswanu mosi ve; yawu kele ve yina ya nge ke tala. Nge ke tala ve na bidimbu ya kimbevo. Tala na yina Yandi tubaka. Kana nge tuba tí: “Mu ke wà kaka mpasi yango,” yawu kele na diambu mosi ve ya kusala na yawu. Nge me sala yina Nzambi tubaka na nge na kusala. Beno me mona, kutala yawu ve. Tala na yina Yandi tubaka. Nzambi tubaka ya ke vwanda mutindu yina! Mu ke kwikila yawu. Beno ve? Na ntima ya munu ya muvimba, mu ke kwikila yawu.

¹⁹¹ Mfumu Nzambi kusakumuna beno tii kuna beto ke monana diaka. Bisambu ya munu kele samu na beno; mpimpa kele mingi ve, mvula ke noka mingi ve. Mu ke sambilaka beno. Beno mpe sambila samu na munu. Tii kuna beto ke monana diaka, Nzambi kusakumuna beno. Ntangu yayi mpangi pasteur, beno me mona.



KUBAKA KIELO YA MBENI NA MANIMA YA KUMEKAMA KNG64-0322

(Possessing The Gate Of The Enemy After Trial)

Nsangu yayi ya Mpangi William Marrion Branham, kulongamaka na Kingelesi, na manima ya midi ya Lumingo, na kilumbu ya 22 ya Ngonda ya Tatu, na mvula 1964, na Lukolo Denham Springs High School na Denham Springs, Louisiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org